

四庫全書

集部

欽定四庫全書

集部  
慢亭集卷六

詳校官中書臣徐志晉

侍讀臣孫球覆勘

總校官庶吉士臣倉聖脉

校對官主簿臣汪日贊

謄錄貢生臣李玉瓚

欽定四庫全書

慢亭集卷六

明 徐燾 撰

五言律詩

甲午赴京留別社中諸子

瓠落甘南郭飄零又北征  
愁心悲遠道短髮戀微名  
別苦嫌情重時危幸橐輕  
勞歌聽已慣任作斷腸聲

別陳惟秦

勞歌君莫吟吟即淚沾襟若比前年別此情應更深夢  
能知道路交只戀山林何處還相憶天涯一片心

溪行即事寄汝翔平夫

客路空回首浮生未息機愁多難得醉夢短不成歸石  
勢流邊缺灘聲過後微翻因旅泊處轉憶舊島漁磯

泊黯淡灘登觀音寺

古寺俯空灘溪深客到難浪疑南海湧山作普陀看旛  
影臨流濕鐘聲出谷寒禪心如止水元不礙風湍

金鳳山逢許道人

高人隱洞天鳥道入雲煙且莫論真訣大都無世緣丹  
爐長自熱火候豈輕傳別去不留意相逢皆偶然

漁梁道中懷葉志卿

當年聯轡處已是七周星野店曾同宿流泉憶共聽殊  
音來往客愁思短長亭不盡懷鄉感因君增涕零

七里灘夜泛

嚴灘行未盡雨氣逼黃昏峽束天疑小溪深水不渾榜

歌何處客燈影幾家村最是堪愁絕三聲半夜猿

桐廬曉發

掛帆山縣曉雲氣滿谿陰雖有風塵役能無丘壑心人  
煙依水近塔影墜江深所嘆垂綸者高蹤不可尋

紫陽洞

石室奇如此全無斧鑿痕虛巖懸作屋曲竇巧成門避  
日晴猶濕屯雲晝自昏平生遊歷慣到此亦驚魂

三茅觀尋許靈長不遇

山色翠氤氲松關閉白雲禮星孤磬發受籙妙香焚夜  
靜天花落秋高木葉聞無由尋許掾長揖問茅君

寄懷黃道晦

各送皆先別君留更一宵江頭兩分手相對各魂銷南  
望驛樓遠北看帆影遙折來亭畔柳此日定蕭條

長貧家累少有道世緣輕山許高人占田歸別主耕老  
惟安落魄隱不愛虛名下榻憐吾弟秋來幾到城

晚至毘陵

榜人窮日力向晚到荆溪近驛舟航滿沿城燈火齊角  
聲悲斷續山色黯東西客子愁無寐昏雅莫亂啼

句曲道中望茅山

停車句曲望縹緲見仙家曠野分青靄遙天結紫霞山  
秋生異草溪午出胡麻欲證延年訣其如道路賒

游牛首山弘覺寺

前身疑老衲所至愛禪林肯惜躋攀力偏宜清淨心山  
鍾吳地秀園布漢時金日午僧寮寂巖扉閉塔陰



牛首祖堂尋雪浪禪師不遇

雲氣掩禪栖山空鳥自啼  
塔陰依日轉鈴語墜風低  
白社虛牛首青山費馬蹄  
無由問真偈歸路夕陽西

雞鳴寺贈印空上人

不用覓三車心能轉法輪  
問年忘歲月留客借雲霞  
乞食朝行脚焚香夜結跏  
誌公金骨在長日禮千花

喜林天懋至得家書

故人傳信至喜極却忘飡  
雖有平安字未開猶膽寒  
筭

程何日寄秉燭幾迴看兩月思鄉淚今宵應暫乾

盧子明張子明何性中胡彭舉林叔度小集客

舍

客中方落莫諸子偶來過有相皆丘壑無言非薜蘿紅  
塵窮巷少青眼異鄉多總是飄蓬者為歡能幾何

瓦棺寺贈全上人

禪房雲氣深一榻傍蕉陰不種生天果常懷出世心鷲  
峰脩白業象教禮黃金何以精名理先師有道林

同陸纂父郭聖僕雨夜集曹重甫客舍得涼字  
客居非蔣徑亦自過求羊綠酒人來貰黃花節後香散  
裘霜氣肅殘燭雨聲涼漏盡欲為別秋宵苦不長

送何性中還會稽

之子竟落魄故人空斷魂煙霞歸舊隱風雨出關門紅  
葉足秋色白衣多淚痕看君年尚少莫即戀丘園

送王獻子山人客粵西

君行當象郡投宿盡蠻家柳暗黎村葉梅寒庾嶺花神

符宵厭蠱人面畫防蛇若到南中日先尋勾漏砂

送林吾宗南還時余將入燕

相逢雖暫喜相別倍含情渡水雁孤影出關雞一聲愁  
從歸路減寒近故鄉輕所歎飄零者風霜向北平

送林叔度之廬江尋劉使君

憐君方倦遊歲晚復依劉衰草逢霜死寒濤逐雪流淮  
南叢桂老江北荻花秋渡口一相送目窮天際頭

題靜海寺慶良上人房

入寺已高春禪關暮靄封潮喧臨水梵雲引過江鐘馴  
象諸天教盧龍近郭峰幾年湖海別此地又相逢

靈谷寺

一徑萬松通鍾山俯梵宮谷聲虛應掌塔影峻凌空不  
壞金身古無梁寶殿雄未忘生滅相長此泣遺弓

咏雨中新草

燒痕纔轉綠含雨未萋萋且緩佳人鬪方聞玉勒嘶苔  
深看莫辨柳亞望初齊為語尋春者無令踏作泥

不寐感懷示元直

孤館聽寒漏燈殘夜未央  
雁聲悲帶雨蛩語急含霜  
旅夢醒難續鄉心醉暫忘  
念君初作客不敢說淒涼

贈魏考叔

所居雖近市苔鎖華門幽  
巾舄遵王制圖書應客求  
揮毫無俗韻下榻有名流  
滿壁滄洲在依稀顧虎頭

別金陵

人境元如夢茲遊真惘然  
一帆揚子月雙屐白門煙  
遇

寺多留偈逢僧盡問禪  
獨餘千佛嶺待我再來緣

懷王粹夫

我遊當薊北君隱在牆東  
兩地魂俱斷中宵夢不同  
燭銷山店雨笳散戍樓風  
雪後無南雁鄉書何處通

同溫允文史聲伯集張穉通清遠居分得留字  
此地本清遠主人情更幽  
游多乘興至客不問名留坐  
卧半臨水往來都泛舟  
醉餘溪上別月色滿中流

天聖寺

高閣對諸峰禪關入亂松  
斷碑留顓顓古殿錯蛟龍  
塵靜難侵佛林疎不礙鐘  
瀟湘圖滿壁彤管有遺蹤

碧浪湖泛月同在杭

扁舟過碧浪孤月出林端  
兔影搖波碎嬋娟落鏡寒  
湖光澄似練山色秀堪餐  
別後幾圓缺今宵纔共看

題顧學憲先生聞禽閣

高閣傍林阿林深衆鳥過  
飛當殘照急噪向晚晴多  
振翼同呼侶歸巢各認柯  
翟公門似水日日可張羅



贈陳道源叅軍

冷曹堪傲性大雅見遺音  
衙只聽鶯放山多信馬尋  
一官同鮑照五字比陳琳  
俸薄難供客時捐賣賦金

曉至甘露寺因憇觀音洞

乘曉到香臺鐘殘僧夢迴  
巖阿精舍隱石竇普門開  
初日躍林出罡風跨浪來  
披榛尋舊蹟一半委蒼苔

甲午汶上除夕

旅館逢除夕空懷故國情  
荒村三戶寂土屋一燈明  
膈

逐雞聲去春隨馬足生客中非守歲自是夢難成

懷張道輔

婚嫁中年畢餘生老一區市聲窮巷寂山色小樓孤林  
密身堪隱田荒口僅餬詩僧同酒伴日日往來無

賦得逍遙游送鄔子遠山人

逍遙非避世只是愛清閒汎月渡千澗隨雲過幾山遊  
同僧共往倦與鳥俱還蹤跡多湖海故園長閉關

題許靈長快雪亭

亭倚吳山麓春晴雪未乾色分江影白光入石門寒洞  
古藏猶濕牆陰銷欲殘應憐高卧者日日映書看

題吳象文抱膝軒

越絕風流客栖遲一畝宮閉門人跡少趺坐世緣空簾  
向雪中捲徑從花裏通主人長抱膝或恐是隆中

送張子環下第枉道之楚尋丁亨文法曹

天涯同失路君豈不懷歸客久行囊罄家貧生計微同  
來知己散便道故人稀獨有荆南吏或能憐布衣

暮出荏平宿二十里村店

征車貪遠宿宿處更荒涼  
出郭纔數里幾家成一鄉  
燈燃綿炬暗茶煮柳條香  
不待晨炊去主人無曉糧

贈瑕丘灌園郭叟

勝地近洙水主人同漢陰  
未忘為圃意偏稱耦耕心  
草色憐顏巷栢枝分孔林  
下車聊共語莫作鳳衰吟

滋陽道中逢金陵秀峰和尚因訊雪浪耶溪秋

園諸上人

如何當此地亦得見名僧托盡他鄉鉢傳來幾代燈烟  
霞生有果雲水跡無憑問徧南朝寺因師住秣陵

登雲龍山放鶴亭

疊嶂隱香臺門當楚水開河流旛影去雲引磬聲來寺  
古龍猶伏亭空鶴不回因尋碑上字剔盡雨中苔

舟中書懷

一別變春秋相隨半是愁思鄉餐頓減感舊淚空流金  
盡羞開篋途遙厭換舟非無山水興客久畏淹留

豈是依人拙此行誰可依途窮勝事少身賤勢交稀客  
路儒無術關門更有威時時戒童僕莫比晝游歸

將別幼孺

離人元作惡況復是心知預灑臨岐淚各抄同賦詩分  
襟愁路促戀別願舟遲童僕追隨久猶能相向悲

松陵舟中送幼孺入苕川兼柬在杭使君及苕

中諸舊遊

懷土情雖切他鄉且暫留去尋苕水吏獨作太湖遊顧

影同看燭含啼各買舟我來慚父老不敢再依劉

溪夜時與惟秦興公遊武夷

往日遊都倦茲行心獨閒片帆投月宿一笠戴雲還  
夜色沙邊水秋光烟外山旅懷長似此那解鬢毛斑

中秋遇風雨

寒溪秋色滿臨汎意如何高枕亂流去掛帆千嶂過  
夢應通月窟槎已到星河不負烟霞想無妨風雨多

同惟秦興公舟中夜坐

臨流趺坐久夕露墜衣繁山色晚逾翠灘聲宵更喧林  
深燈避影雲重月虧痕不愛聞雞犬停舟莫近村

贈惟秦

平生隱不出出便為尋真世上風波免途中聞見新拋  
家無內顧學道有前因卻笑虛名客江湖勞此身

曉發

枕上榜歌起溪中行侶稀纜牽烟縷細帆掛月痕微曙  
逐雞聲盡濤驚客夢歸沿洄三五里猶未見朝暉



贈黃君甫山人

烟霞久已親無語到紅塵著姓同江夏  
逝名比富春長貧玄草客未老白雲身  
不脫吳鉤贈君家在劍津

登接筍峰

丹梯懸削壁鐵索纜紫紆魚貫崑崙當面猿攀石礙趺氣  
同看月喘聲各入雲呼蛺蝶過龍脊茅房見一區

陷石堂

綠溪下復登山色翠層層洞以水流闢石從雲壓崩落

花魂卧草空樹腹吞藤漸覺非人境風光近武陵

贈安道人

丹房占翠微靜極悟玄機玉液喉間咽金精肘後飛  
禮經隨衆慣揮麈見人稀豈是無家客三年不一歸

贈江仲魚

君家雖附郭多在武夷居有水皆移櫂無山不結廬  
宵全藏洞壑交半混樵漁懷友秋風裏從今或到予

仲魚  
有秋

風懷  
友吟

懷顏廷愉

流落有如此壯心終不酬文多為客難劍未報君讐失  
職辭戎幙移居近比丘世情容易變莫向灞亭遊

送興公弟遊吳越

獻書予未遇彈鋏汝何依片刺投人拙諸侯禮士稀出  
門家累斷為客衆愁歸不必羞貧賤詩名在布衣

題畫菊贈黃博士印坤

南山相對處籬下有餘芳開向三秋晚食來五內香葉

同顏不老花與髮俱黃  
歲歲金風起披圖一薦觴

春夜同錢叔達陳惟秦齋中雨坐

高齋開亂竹孤燭坐潺湲  
世味隨年減浮生到夜閒  
交應同白水語不離青山  
城市紅塵滿烟霞獨此閒

寄陳平夫

聞說清溪上經年但索居  
詩因閒轉廢交到老偏踈  
酒癖難全減雄心可便除  
燈前思舊好空檢往來書

春日雨中喜惟秦至

齋居耽閒寂猶厭麋麋羣茶汲松泉煮香收桂屑焚避  
人宜晝雨來客損春雲不帶紅塵至寥寥獨見君

過惟秦幽居

數歇經村落到門紅日西柳陰牛獨寢草舍燕雙栖野  
綠雲千畝郊青雨一犁空林烟火起留客晚蒸藜

同鄭吉甫過仁王寺懷徐仲和久客莆中

燈火佛堂虛經行月上初草生遊子路松偃化人居春  
盡鶯花老天長蝶夢疎如何逢九鯉不寄半行書

病

一春餘幾日況復卧文園山色來欹枕鶯聲老閉門擁衾無早晚來札半寒溫漸覺詩籤減惟看藥裏存

雨中屠田叔使君招集烏石山同錢叔達陳幼孺王粹夫曹能始興公弟分得深字

選勝坐危岑山高紫翠深受潮千澗滿翳雨半峰陰夜中春寒薄鐘過暮靄沈使君行役近猶不廢登臨

送張孺愿之漳南

離亭柳正長匹馬向臨漳別路聞鶯語遙空起蜃光颿  
風吹海暗蠻雨洗天涼去去頻沽酒茲行是瘴鄉

屠田叔雨中過酌草堂分得窮字

誰謂諸侯貴來過一畝宮天低峰影逼雲耗雨聲窮殘  
溜虛檐滴新苔怪石蒙慚無池館勝不敢醉山公

寄張成叔

杯酒片時親都亭各問津玉河堤畔柳又見一回新月  
冷閩天夢花明越嶠春聞君廬墓側白兔向人馴

悼殤子

五日人間世千秋骨肉情未能留幻質空自試啼聲眷屬知何劫輪迴又此生愁心安可慰婚嫁累尤輕

咏佛手柑

兜羅軟似綿移種到人天妙相終成果清香不讓蓮交枝疑合掌屈指欲為拳肯向車中擲留將供法筵

喜康元龍歸自靈武

自逐征西府空驚兩鬢斑塵沙過隴水風雪度蕭關刀



斗邊城暗烽烟戍壘閒故園初下馬一劍在腰間

輓周候官

雙鳬何處飛父老泣沾衣舊客雲同散虛名露易晞關  
河孤櫬遠風雨旅魂歸他日過荒隴松楸大幾圍

柬陳汝大

愛君栖隱處一室白雲深古壁藤花亂空庭桐葉陰靜  
能銷世態老得遂閒心自愧嵇生懶經年不入林

送陳可棟還松溪

相見復離羣一杯歌送君輕紅辭荔火寒翠夢松雲樹  
影綠山轉溪流向縣分蟬聲脩竹裏明日不同聞

送陳汝翔遊龍虎山

布褐與黃冠遙尋正一壇靈符求玉印神鼎問金丹禮  
斗七燈焰降魔雙劍寒龍沙遺讖合計日待驂鸞

送陳彥宗之永嘉

皖城歸未久又復向東甌總為饑寒出不然何所求帆  
飛瘴雨濕衣觸火雲流縱是囊羞澁還須鴈宕遊

送余印卿秀才還濰陽

相違雖不遠相送亦應難  
寶劍脫為贈瑤琴何處彈  
行裝三伏雨孤棹百重灘  
想到家林日猶懷荔子丹

送鄭震卿之吳越尋兄

汝兄遊不返汝去遠相尋  
試問孤身客飄零何至今  
見時應慟哭語罷定傷心  
坐待離羣雁聯翩向故林

送林應卿進士理梧州

擁傳過藤峽開衙傍鬱林  
蒼梧寒岫翠青草瘴雲深  
蠻

吏多夷禮獠民雜土音此鄉山水好公暇足登臨

送張公魯還甬東

知己難爲別況逢搖落時  
斷猿吟樹慘羸馬過山遲  
夜月嚴陵瀨秋風賀監祠  
清狂懷小阮誰共竹林期

答贈黃君甫

家居延水濱劍佩七星文  
竹杖千山月荷衣五岳雲  
跡多方外見名喜世間聞  
從此辭塵網飄飄驚鶴羣

寄朱善侯秀才

雖然蓋未傾年少即聞名才似王文考狂如禰正平雞  
壇盟越國龍劍出豐城自有驚人語看君時一鳴

哭王孔振客死瀘州

飄零萬里客客死更誰依路遠計音緩家貧弔者稀巴  
歌舁櫬曲樟布附身衣蜀道難如此游魂歸不歸

哭顧道行先生

誰謂江干別竟成生死分梨園翻薤露苔館悶蘿雲地  
遠計難定天高哭不聞酬恩空一劍何敢掛孤墳

送葉秀才還松溪

茲行路幾重去矣不從容  
試問君歸興何如秋色濃  
香殘霜後菊濤響月邊松  
隔斷相思夢千峰與萬峰

為親乞祿詩贈丁文統邑丞

薄宦不謀身卑栖向海濱  
暫為黃綬客少慰白頭親  
退食稱觴便休衙問寢頻  
有人猶負米五斗莫嫌貧  
豈是愛微官因承祿養歡  
公厨充菽水海錯佐盤餐  
振藻宜花縣哦松傍藥欄  
浮沈元世路莫謂折腰難

題陳幼孺招隱樓

叢桂許誰攀  
經年不閉關  
池平吞月淺  
林靜受雲閒  
草色春愁外  
禽聲午夢間  
開窗嵐翠滿  
疑對八公山  
石磴轉松陰  
高樓面翠岑  
薜蘿春雨細  
橘柚暮烟深  
夜月喧林犬  
微風掠水禽  
一丘招隱處  
應慙白雲心

偶成

吟詠隨真性  
行藏聽自然  
因窮閒半世  
託病謝諸緣  
乞字人催債  
脩琴鋪索錢  
辛勤猶一事  
洗硯竹根邊

題博古齋贈蔣子才

寄跡多湖海，迹名且市塵。一區揚子宅，四壁米家船。玉  
辨荆山裏，書收汲冢前。耽奇同有癖，相過定留連。

元日同閔壽卿錢叔達興公弟過定光菴訪樂  
上人

避俗懶迎客，齋心同結緣。樹枝增一臘，栢葉禁諸天。法  
供更新水，香爐宿舊烟。空門無歲月，塵世自知年。

閔孝昭送其尊人隱武夷自歸廣陵賦此以送



忍淚別嚴親  
長途劍衛身  
烟花歸路客  
風浪渡江人  
馬踏梅天雨  
鶯殘瓜步春  
從今閩海熟  
定省莫辭頻  
送父隱九曲  
辭歸天一涯  
他年同拔宅  
此日獨還家  
別夢繁芳草  
征帆過落花  
無勞慮甘旨  
品洞足烟霞

再送曹能始

此日鳴騶去  
當年戰勝歸  
故人供別酒  
關吏識行衣  
起草依丹禁  
含香覲紫微  
漢廷方貴少  
年少似君稀

送林兆綸游武夷

飄飄鸞鶴羣去謁武夷君溪曲斜流月峯多亂占雲石  
牀深草色玉簡翳苔文半夜天壇上一聲清磬聞

送張叔麟別駕歸永嘉

言別淚潸然況君非少年殘鶯孤店雨羸馬斷橋烟劍  
已分雷煥刀猶佩呂虔故山隣雁宕莫惜繫書傳

同吳元瀚興公弟暮過神光菴

薜蘿深處入一徑自逶迤待月嫌林翳看雲怯石危巖  
陰燈影晦山靜磬聲遲雖有重來約重來知幾時

同閔壽卿柳陳父吳元瀚興公弟避暑仁王寺  
因憩天秀巖

結夏依禪窟松關閉寂寥摩厓猜古篆相地徙團瓢赤  
日過林盡紅塵到寺銷清涼元有境人自愛炎敲

題吳元瀚小像

披緇還戴笠獸自坐峻嶒有相元虛妄無言即上乘形  
將同木槁心已似波澄不是舊相識翻疑何處僧

同蕭二丈林子真興公弟微上人定上人過遇

公轉華菴

因與山僧熟祇園來往頻一時無俗客半日有閒人巖  
樹雲邊暮池花水畔春掃除嫌太潔翻覺此身塵

西禪寺

野曠烟光薄林深暑氣微亂蟬鳴覺路一犬護禪扉花  
竹通諸徑旃檀大幾圍雲房吟卧久直到晚涼歸

夏日偶成東惟秦

何方堪避暑勝地覓清幽坐選雲邊石吟尋水畔樓偏

宜山友共唯許野僧留一日一丘壑安閒直到秋

夏日園居柬履吉

山靜晚涼初僧寮寂不如礙雲嫌竹密受月愛藤疎茶  
熟焚香飲詩成洗硯書惟君知此况願數過吾廬

懷元直客金陵

經年客白門書札見寒溫共作幾回夢各銷無限魂聽  
鶯桃葉渡嘶馬杏花村欲識思君淚請看衣上痕

送陳廣文棄官還溫陵

白首厭微官滄江戀釣竿  
隱耽初服貴老怯舊氊寒  
綠酒粉榆社清齋苜蓿盤  
好將平子賦時對刺桐看

送白經歷入覲

遷客朝天去王程不可留  
誰知飛輶日政及賜環秋  
殘雪燕山路微霜濟水舟  
從來白司馬未合老江州

秋日偶成

山翠夕陽天齋居息衆綠  
倦啼將暮鳥哀咽過秋蟬  
榻靜喧松雨窻疎納竹烟  
微吟多信步行到蓼花邊

送錢叔達還吳興

住傷流落久去惜別離難衣上三年淚尊前片刻歡西  
風楊柳岸夜雨蓼花灘山水含孤調從今何處彈

過惟秦響山堂

習隱栖南畝躬畊受一廬激流崩野岸鑿井割鄰泉蟾  
龜遊絲困鳬鷺亂葦眠考槃吾有志敢吝買山錢

經廢寺

寶殿莽蕭蕭殘僧宿敝寮壁餘昏後畫樹絕掛時瓢碑

毀龜跌損梁荒鼠族驕聽經知識少馴虎度危橋

送王獻子還袁州

相逢當夏首相別忽秋殘逆旅淹留久空囊去住難  
蘆飛鴻外白楓落馬頭丹已乏綈袍贈霜風今又寒

寄題鄧國弼貯青亭

烟霞處處深紫翠滿遙岑夜靜松分竅天涼竹送陰  
野磨隨獨往山鳥答閒吟古木蒼蒼色居人指鄧林

題余伯明龍沙遺讖



相逢証九還一竅指玄關道契鴻濛外神遊鶴馭間丹  
砂延綠髮白日駐紅顏試問龍沙會予名列幾班

涪州張節婦

涪水澄如練還同節婦心栢舟吟自苦湘竹淚何深矢  
志終箕帚留顏見藁砧貞魂應不朽褒寵有綸音

方山嚴孝子

苦節甘辭祿幽栖瀨水邊為憂親白髮非薄宦青氈名  
列高賢傳山留處士阡遺孤垂老日猶廢蓼莪篇

芊江雪夜留別社中諸子

歲晏強為客時危怯離家孤身衝雨雪雙淚別烟霞前路天難盡故山雲易遮半生于役苦贏得鬢將華

不寐

展轉懷鄉國愁心夜更繁猿聲烟外峽漁火水邊村屢醒無完夢頻啼有亂痕廿年嬰世網銷盡幾多魂

滄峽道中即事

臘盡天猶暖林深翠未凋石多盤谷口路半出山腰雲

色愁當岫灘聲怒過橋郵亭看尚遠落日見歸樵

閨情

淚盡閨中燭腸迴錦上文蛾眉羞寫月鸞鬢罷梳雲枕  
怯羅衾冷香孤綺閣薰空牀本無寐况復夜蛩聞

度分水關

鳥道盤雲際停車怨隴頭封疆分異域關路割雙流地  
盡辭閩嶠山窮見楚州多情故鄉水鳴咽為含愁

吳江哭顧道行先生

圖報慙無地哭聲空震天恩私諸子外知遇十年前殘  
篋玄經秘儀牀絳帳懸舊題詩滿壁一讀一潸然

送鄔子遠還京口時鄔有喪子之戚

相逢俱失意相送奈愁何老去雄心減春來歸夢多舊  
山懷北固新淚滴西河世路已如此空為勞者歌

望月有懷和陸纂父

一別經圓缺三秋望轉明蛾眉今夕影鸞鏡舊時情貌  
逐清輝減愁隨素魄生關山千里隔何處照盈盈

送蔡千戶襲職還吳興

龍韜堪報主燕領定封侯掛印還鄉里揮鞭出御樓歸  
途尋越絕行橐佩吳鉤戎馬東南急憑君借筋籌

都門逢湛如和尚

金陵留偈別燕市忽相逢不托侯門鉢閒聞禁苑鐘經  
文繙北藏禪理悟南宗行脚他鄉久空房偃舊松

訪楊山甫

相過即留連因君卜築偏香銷爐有燼茶熟甕生烟採

得芸驅蠹裁將柳借蟬門前時載酒來叩子雲玄

同陸纂父暮酌程康伯花下得枝字

幽齋當薄暮移酌傍花枝選樹鶯窺酒穿林蝶罨絲月  
低流影緩風細度香遲不憚頻來此交歡無幾時

同陸纂父山人楊山甫保御集程康伯典客衙

齋看芍藥

異種分仙禁嬌姿冠衆芳當階翻絳艷傍砌發濃香鄭  
國佳人贈吳宮西子妝畫欄春色好不用說維揚

曾人倩雨中過酌

故人休沐暇窮巷過吟鞭散帙鉤簾坐尋詩解帶眠馬  
蹄淹暮雨鶯語亂春烟自與壚頭熟不愁無酒錢

周叔宗郁孟野俞羨長李長白黎慎甫雨集分  
得微霽

如絲看乍歇庭際尚蕭森已覺收殘靄翻疑結薄陰晚  
山消夕暈好鳥間新音徙倚花林暮斜陽生遠岑

題曹能始計部潞河公署園亭

司農開別墅一徑滿烟霞與鶴同臨水隨蜂共放衙榆  
飄沿徑莢榴發傍牆花自足園池樂無煩到習家

送金季黃山人游五岳

年來婚嫁畢五岳寄閒心勝地隨緣住名山到處尋孤  
筇青嶂老雙屐白雲深去矣辭塵網高蹤比向禽

潞河別曹能始

悲歌燕市筑歸興潞河船作客有何意還山仍種田窮  
猿投散木飢鶻倦遙天以我空囊故憐君損俸錢



流落誰如我艱危况別君渡淮三伏雨瞻闕萬重雲殺  
氣旌旗滿哀聲鼓角聞臨岐雙涕淚不獨為離羣

昔年同獻賦此日尚沉淪我有恸皇淚君憐棄置身黃  
塵歸路客白髮倚門親不盡消魂意哀歌難重陳

久已歌黃鳥還勞賦白駒心雄猶短劍目斷更長途去  
住總歸客行藏空腐儒故園關百慮何敢畏馳驅

潞河驛別周叔宗

經時俱作客此地且盤桓去路黃塵滿征衣白日寒吳

歌聊自和燕月暫同看因悔長安陌蹉跎未盡歡

出都門留別茅平仲周思敬朱汝脩吳孝甫張  
孺宗趙凡夫鍾山甫韓兆之吳載伯阮步文

張曰肩諸君

違時空獻策落魄出燕南戀闕情無極離人思不堪綠  
楊鶯睨皖青草馬驂驛總是飄蓬客何時又盍簪

濟上

歸興已如此歸帆尚濟州沙汀蘆受月江岸蓼迎秋不

盡聞天遠無情  
汶水流敢辭留滯  
苦其奈倚門憂

太白酒樓

太白久不返  
酒樓猶未傾  
當年聊一醉  
千載仰高名  
隔岸圍山色  
憑欄到水聲  
風流無賀監  
過客若為情

王粹夫客淮上先歸相尋不值詩以懷之

我來淮水上  
君已解歸舟  
逆旅無長策  
天涯總薄遊  
早辭征路苦  
先見故園秋  
漂母祠前過  
因之雙淚流

夜宿焦山贈道林上人

鷺嶺傍龍宮慈帆但信風懸燈孤嶂裏洗衲亂流中山  
靜雲歸錫湖平月印空道林名不忝禪理似支公

晚過惠山

舍筏尋蘭若斜陽古殿開竹烟深似雨松瀑響如雷水  
逐鐘聲去雲從塔影來清泉隨意取裝得滿船回

王百谷招集南有堂

故人三載別此日一尊同菴度旃檀雨池涼蘋蓼風暮  
蟬歸樹急殘暑入林窮座客多湖海鄉心因暫空

題姚叔乂玄散齋

幽齋栖委巷蕭散寄高吟  
筆底青山債尊前白髮心  
俗緣閒漸減玄理老彌深  
三徑蓬蒿滿唯容二仲尋

同沈穉咸過寒山寺訪旭公

曲岸暫維舟精廬訪比丘  
鐘聲聞半夜杯影見中流  
榻倚千花晚房開萬竹秋  
相看成一笑疑是虎谿遊

贈劉會卿保御

但得筋骸健何妨鬢髮蒼  
詩成開白社書就秘青囊  
世

事閒能遣機心老易忘時時留客醉絲竹滿高堂

贈沈公繩

久已稱三絕真如顧虎頭杜門閒自得於世澹無求丘  
壑胸中相瀟湘筆底秋沈郎腰細盡盤礴未能休

哭鹽官斯學上人

微塵元世界師已厭微塵滿月初圓果浮雲易了身曇  
花天外散金骨塔中新不作無生想聞之應損神

常山道中

來時逢朔雪歸路又秋風客計慚羸馬鄉心逐去鴻喜  
看閩地近漸見越山窮想到家林日籬花開幾叢

經舊遊懷康元龍

西陵分別後蹤跡各飄零又見楓林赤依然酒幔青關  
河仍舊路風雪憶郵亭獨坐孤燈下踈碁未可聽

鷺湖晚行

一徑入莓苔前峰夕照催饑鳥遶樹去乳犢出林來山  
色自然秀野花無意開村村足幽趣差得少遲迴

車盤驛

征途秋草遍客子倦知還歲晚縲車急年荒水碓閒峰  
巒青絡繹溪澗綠迴環落日蒼茫外何山是故山

歸次建溪聞鄭君大訃詩以哭之

忽爾傳君死猶疑訃未真哀來魂欲斷痛定淚沾巾泉  
路何其近皇天太不仁高陽脩舊社應少白頭人  
送我荷亭上相看惜解携生離猶唧唧死別重淒淒世  
不容豪俠天疑愛滑稽魂兮招不返歌罷數行啼



正擬還家日對君懷抱開如何千萬語總作一聲哀淚  
不到泉壤書難通夜臺或君靈爽在知我已歸來  
交遊君最長矍鑠有誰羣對酒杯邀月看山屐躡雲貧  
猶開白社老不厭紅裙何意經年別歸來便哭君

秋日載酒同陳汝翔黃伯龍惟起惟揚二弟訪

王玉生郊居

綠酒因君載青山與客同畫成真道子隱去即龐公丘  
壑村村合桑林巷巷通坐來香不斷窗外木犀風

冬夜袁無競過酌

鐘聲排小閣燈影墜孤尊竹淨雲陰薄花踈霜氣繁  
喧雖近市幽僻亦深村坐久兒童睡山風自掩門

陪屠田叔使君游仁王寺同康元龍袁無競興  
公弟分得迴字

鐘磬近香臺鳴騶半路迴莊嚴菩薩界善信宰官來  
合掌緣同結攢眉禁暫開山僧能愛客蓮漏不頻催

送黃若木還莆

執手向城隅送君歸鯉湖風濤危渡峽雨雪倦登途遣  
日携書卷消寒問酒壚不須嗟伏櫪千里待名駒

高賢祠成荅屠使君

廟貌壯千秋英靈託一丘藻蘋無俗客香火總名流白  
骨化已久清魂吟未休預知百歲後同得此中游

八代斯文振全閩雅道尊精靈同不滅顯晦未須論權  
自操吾黨名非藉子孫泱泱東海上真可霸中原

新祠勞仰止神理定非遙五世應難斬千秋永不祧像

從詩外想竟向賦中招後死吾徒在遺風未寂寥

俎豆隆殊典山林更有光詩真傳在世沒果祭于鄉身  
後榮如此生前困不妨當年冠蓋者誰敢望宮牆

困溪十里橋與屠田叔泣別

從來軒冕淚不滴芰荷衣獨有今朝別使君先淚揮地  
偏愁會隔天濶恐書稀望望車塵遠人人哽咽歸

惟秦冬夜偶至擁爐對酌率爾成咏

音從空谷聽興似剡溪乘楫拙殘爐火松骨半壁燈俗

情談後減詩草別來增濁酒堪消夜渾忘朔氣凝

有感

傳聞關白死海氣絕氛腥間諜防真偽悲歡雜涕零王  
春回雨露天怒息雷霆時事難高枕端居莫謂寧

餒虎橫行甚村氓骨半枯猛應憑偃鬼威或假妖狐白  
晝常當道清時敢負嵎官兵虛搏擊雞犬反驚呼

久雨防時歉囊空米價騰子錢殘歲急官賦隔年徵薄  
劣明時棄疎慵末俗憎處離同斥鷃未敢望鷗鵬

贈本淨上人

信心歸淨土行脚到閩天  
度衆時開講降魔夜不眠  
聞鐘能悟性補衲恐妨禪  
何日叅猊座焚香聽白蓮

題林明府先輩輓詩卷後

鄉錄留名姓遺圖見影神  
鳴琴澌水曲歸櫬贛江濱  
哭墓門生老傳家嗣子貧  
卷中哀輓客存者更何人

慰陳平夫

憐君多難日知己亦銷魂  
已歎如懸磬何堪復鼓盆  
舊

情思挽鹿新恨聽猿為問牛衣上添將淚幾痕

與黃道晦夜坐話舊

零落田園後還嗟世事更眼昏妨夜讀身老廢春耕稻  
麥虧豐歲鰲鹽淡此生相看燈影裏無限舊時情

歲暮戲題詩稿後

本以牢騷著多因幽憤成雌黃招衆口青紫誤今生落  
落無窮意遙遙不朽名萬言難卒歲掩卷獨傷情

水明樓贈陳仕卿

日日來相訪愛君幽意長  
畫題隨客命詩債逼人償  
聽雨坐蕉徑放雲開竹房  
入林無小阮終少七賢狂

賦得繫臂紗送陸姬

紅汗沾猶濕纏綿玉釧知  
暗香生皓腕微暈隱豐肌  
疑作同心結看如續命絲  
守宮今褪盡情重枕郎時

題普通寺

山城已在山寺更翠微  
間磴路危因石杉松密  
護關鶯聲無意巧雲影  
自然閒徐步經行久  
桐花滿地斑




贈黃思衡廣文

意氣貧難減文章老更工  
身閒貪佛日官冷稱儒風  
夫子推楊震經生重馬融  
劍鋒銷未盡耿耿尚如虹

懷惟秦客粵

計程當入粵蹤跡竟何如  
馬度枰欄密鶯啼簞竹疎  
定回天外夢誰寄嶺南書  
寂寂蠻村路知應念索居



幔亭集卷六

欽定四庫全書

集部  
慢亭集卷七

詳校官中書

臣徐志晉

侍讀臣孫球覆勘

總校官庶吉士

臣倉聖脉

校對官主簿

臣汪日贊

謄錄貢生

臣李玉瓚

欽定四庫全書

幔亭集卷七

明 徐燾 撰

七言律詩

吳城覽古

白雲猶繞舊王居，獨對西風恨有餘。  
百戰山河歸草莽，千年陵寢總丘墟。  
月明茂苑遊麋鹿，花暗荒城弔闔廬。  
況是異鄉多病客，豈堪吟眺暫躊躇。

古意

一天秋色露華清，獨倚妝臺別恨生。  
錦字緘愁過薊水，寒衣將淚到遼城。  
夢迴萬里金微路，腸斷三更玉篴聲。  
起視明河人不見，朔雲邊月總關情。

塞下曲

沙磧風高敵騎侵，將軍新戰賀蘭陰。  
塞霜曉角降王淚，漢月秋笳壯士心。  
刀上洗瘢青血冷，營前望氣白光沉。  
旄頭未落邊烽急，腸斷空閨戍婦碁。

送人入蜀

忽聞天末雁聲悲，况是尊前送客時。  
白髮尚懷江海夢，青山空負薜蘿期。  
馬經劍閣晴虹斷，帆過巴川夜月遲。  
夔府城頭應弔古，寒雲漠漠草離離。

西湖泛舟

夕陽簫鼓起中流，十里芙蓉兩岸秋。  
行帶亂縈青雀舫，菱歌低度白鷗洲。  
吳山積翠斜侵郭，越女凝妝盡倚樓。  
三竺鐘聲聽漸遠，半江微月送歸舟。

飲王氏南園

南園精舍遠塵囂晏坐松陰暑氣消  
鷺嶺雲光連古堞  
馬江帆影逐歸潮乍聞金鐸當空斷  
遙見珠旛隔寺飄  
日晚寒鴉栖欲盡海風吹月上山椒

青樓曲

美人家住五陵東溝水門前曲曲通  
簾影半邀金市月  
簫聲閒度玉樓風  
舊翻小扇桃花碧  
新製單衫杏子紅  
十二欄干千樹柳不知何處繫青驄

送游方僧

春風初動雪初晴  
錫杖今朝出化城  
萬里雲天孤鶴影  
滿林烟樹亂鶯聲  
禪心客路隨流水  
古院荒山閉月明  
自是空門無定跡  
河橋此別漫關情

秋夜送客

秋至關河木葉乾  
送君西去路漫漫  
潮喧古渡猿啼隱  
露下空江雁影寒  
數點漁燈歸浦遠  
一聲僧磬出林殘  
片帆渺渺知何處  
後夜相思獨倚欄



金山寺別恩上人

忽聞鐘韻出林微  
話別空門思欲飛  
日暮西風吹客棹  
夜深涼月夢僧衣  
蕪城歲晚蘆花盡  
瓜步秋高木葉稀  
從此分携各南北  
更於何處問禪機

煬帝行宮

滿目繁華一夕空  
至今行客說離宮  
垂楊舊見朱旗繞  
芳草曾經翠輦通  
商女歌殘花落後  
妖姬魂散月明中  
可憐淮水龍舟戲  
聽得江南曲未終

廢殿荒涼噪暮鴉  
廣陵潮滿夕陽斜  
一從鳳輦歸黃土  
無復龍舟駐翠華  
春盡冷烟生蔓草  
夜深明月照瑤花  
當時複道今何處  
半屬蕪城百姓家

雪中登富春山

羣山萬壑白嶙峋  
雪裏移舟問富春  
諸將漢家依日月  
故人天上動星辰  
千年宿草埋鐘鼎  
七里寒烟護釣綸  
最羨羊裘堪傲世  
青袍愁染洛陽塵

姑蘇懷古

秋風吹送木蘭橈無那愁心逐暮潮響屨廊中歌舞散  
姑蘇臺上鹿麋驕東吳霸氣今俱盡西子香魂不可招  
半夜烏啼鐘欲動無情明月照楓橋

蘭陵道中寄同社

木落孤城歲易闌征途何日到長安匣中寶劍霜花冷  
客裏金尊竹葉殘兩浙名山方駐馬七閩諸子正登壇  
忽聞白苧歌聲起欲倩西風寄澤蘭

經黃河寄懷陳平夫

隔岸驚聞伐木歌，櫓聲搖月下黃河。  
六溪晝靜枯桐冷，三徑春深芳草多。  
滿路繁霜凋客鬢，半江寒雨夢漁蓑。  
思君不奈風塵遠，夜夜愁心逐逝波。

易水道中答謝在杭

翩翩擊筑共遊燕，慷慨行歌易水邊。  
九曲河流看似帶，三春楊柳折為鞭。  
詩成馬上無須草，酒買壚頭不論錢。  
此去長安應咫尺，與君同賦帝京篇。

清明日飲陳子卿燕南客舍

燕市逢君倒接羅，幾迴相樂又相悲。  
天涯踪跡同萍梗，客路年華寄柳枝。  
南國詞壇高赤幟，西山爽氣落瑤卮。  
若非暫過梨花院，辜負春光總不知。

下第呈孫子樂省元

黑貂裘敝出長安，客路春光半已殘。  
燕市柳從歸處折，故園花在夢中看。  
處囊壯士猶潛穎，落魄王孫未築壇。  
飄泊風塵還自笑，十年依舊一儒冠。

平望舟中同在杭晚眺

片帆湖上正黃昏萬頃湖光浪不翻別後久無千里雁  
月中同聽一聲猿半汀菱葉爭迎棹滿目蘆花不見村  
無數漁歌雲外起天涯孤客易銷魂

王百谷半偈菴贈順公

彼岸由來不易登仲宣樓上遇名僧演成西竺三車法  
傳得南宗幾佛燈紀臘每栽香國樹題詩常買剡溪藤  
漫言自昔耽禪說身捨空門愧未能

婁江哭王太常敬美先生

箕尾騎來歷幾秋招魂慟哭過西州雲飛澹圃愁無色  
水到婁江咽不流寶劍此時懸季子明珠何地報隋侯  
丘山零落空華屋徒抱人琴痛未休

哭王太常墓

一夜文星落太空中原驚嘆失人龍五湖方遂鴻冥志  
千載真成馬鬣封門下幾人歌薤露墓前今日挂芙蓉  
招魂宋玉吞聲哭欲叩天閭第九重

陳价夫歸自崖州談粵中山水因懷舊遊

珠崖彈鋏動經年醉抱黎姬酒肆眠笑語尚存湖海氣  
衣裳猶帶島夷烟波羅老去甘如蜜萋萋開時小似錢  
十載遊蹤俱是夢不堪重聽舊山川

送劉司理考績之京

北望京華去路賒法星長照使君槎一官佐郡來分竹  
三載王程正及瓜匹馬夜嘶燕市月新鶯春囀上林花  
天朝正待平反疏父老前途不用遮

贈蔡景明叅知



托跡江湖二十霜  
名山遊遍不齋糧  
斗間能辨龍文氣  
粉署曾含雞舌香  
夜月久虛玄草宅  
客星還照紫薇郎  
山川信美皆吾土  
何用登樓憶故鄉

過邵夢弼廣文山居

家傍城南薛老峰  
衡茅長閉白雲蹤  
讀書早已過袁豹  
作賦元堪比士龍  
座上一盤餐苜蓿  
匣中三尺掛芙蓉  
山間忽聽蘇門嘯  
知隔烟蘿第幾重

送趙仁甫司理左遷之京

十載功名嘆積薪風波萬里一孤臣  
江潭此日歌漁父  
宣室何年問鬼神自是蛾眉終見妬  
豈知龍性故難馴  
邇來詞客方多難莫向長安逐酒人

哭邵夢弼廣文

雲黯烏山舊草亭撫牀慟哭淚交零  
百年天地收靈氣  
半夜詞壇隕將星挂壁哀絃今已斷  
隔隣長笛不堪聽  
茂陵死後多遺稿剩有殘編著汗青

賦就招魂竟莫還天閨虎豹正當關  
更無白日能迴照

豈有金丹可駐顏  
死後脩文居地下  
生前遺墨在人間  
青門皓首幽栖處  
桂樹蕭條不忍攀

中秋飲西湖澄瀾閣觀妓

八月秋風冷芰荷  
西山爽氣晚來多  
千重樹色濃於染  
十里湖光澹似羅  
白社共酣桑落酒  
紅裙齊唱竹枝歌  
今宵若得君平卜  
知泛星槎入絳河

挽吳門沈汝明處士

蕭蕭白髮老山林  
處士星文一夜沉  
隣舍幾能悲短笛

中原誰不嘆亡琴空林猿鶴春無主滿地松楸日易陰  
墓與要離孤塚近梁鴻高節尚堪尋

齊將軍席上聞歌

七載韶華嘆逝波天涯尊酒喜重過春風海上銷兵氣  
夜月軍中奏雅歌仙子吹笙年正少將軍入幙客偏多  
灞亭醉尉應相避敢問今宵漏若何

送熊益中孝廉歸豐城

征亭尊酒暫躊躇一曲陽關恨有餘月裏龍精歸劍浦

雲邊馬首出匡廬故園春盡鶯聲老驛路天長雁影疎  
明到長安同獻賦知君才藻逼相如

贈黃瞻山先生

年少聲華動五侯老來長嘯臥滄洲門無車轍堪羅雀  
家有圖書可汗牛流水一村韋曲社桃花三月武陵舟  
知君猿鶴盟猶在好看青山到白頭

贈歌者

鶯喉宛轉舞蹁躑唱徹涼州第一篇緋嶺羽衣王子晉

漢宮麗質李延年袖當臥處還堪剪錦擲筵間不用纏  
三過雍門稱絕技可能歌勸上留田

沙口夜泊答宗思兼見示

薄暮停橈水一灣沽來村酒破愁顏戍樓殘角吹霜落  
別浦漁舟刺月還幾點昏鴉歸木杪數家寒火出林間  
漫言潘岳猶年少憔悴西風鬢易斑

重陽前一日寓寶嚴寺

為憐秋色滿禪房回首家山幾斷腸季子黑裘淹歲月

潘郎青鬢怯風霜天涯佳節愁中過上界鐘聲夢裏長  
飄泊異鄉知己少明朝誰泛菊花觴

江郡侯招飲西湖同曾人倩謝在杭分得遊字  
乞假邀驩露冕遊暫從湖上駐鳴騶千層粉堞連雲起  
一帶滄波遶寺流大夢山前春意動澄瀾閣上雨聲收  
江淹彩筆雄今古敢對青尊共唱酬

送黃居約司理英州

少年新佩呂虔刀擁傳東行意氣豪公署遙開瀧水濶

法星還傍斗垣高，曲江柳色迎征幃。  
庾嶺梅花照錦袍，同聽鹿鳴君已貴。  
可無書札慰蓬蒿。

己丑除夕迎春同陳振狂過鍾山寺訪曾人倩  
適瀚上人至同得僧字

嶺南才子氣憑陵，剡水孤舟興可乘。  
青樹又添階下臘，緇衣同對佛前燈。  
漫誇市上春如錦，且醉尊中酒似澠。  
總是空門無去住，好將真偈問名僧。

庚寅元日曾人倩過訪同謝在杭分韻



故人騎馬到岩阿，同泛椒花醉薜蘿。  
別後青雲俱未達，鏡中華髮近如何。  
鷗盟隱去還堪結，馬齒年來覺漸多。  
新柳河橋初綻綠，明朝且莫賦驪歌。

鍾山寺送曾人倩歸嶺南

曾向東阿酒肆逢，重來相見未從容。  
帆飛炎海三秋月，門掩青山半夜鐘。  
客路迎人惟柳色，貧交贈別只芙蓉。  
遙知他日相思處，夢在羅浮四百峯。

送江太守兵備三吳

登車攬轡正秋分臥轍無能借冠君郭外一錢遮五馬  
匣中雙劍靜三軍霜臺俯瞰婁江水行部遙飛震澤雲  
自愧淺才甘寂莫誰因羽獵薦雄文

送謝伯元之金陵

長江渺渺片帆開一曲離歌落照催挾妓每過桃葉渡  
尋僧重上雨花臺芙蓉古岸猶堪采未黍遺宮盡可哀  
不必登高頻弔古六朝王氣已成灰

溫永叔郡丞以詩見贈賦答

南國風流溫太真翩翩才藻更誰倫幾年作吏猶分竹  
何處逢人嘆積薪郡劇不妨三日醒甌空寧厭一官貧  
使君賦有凌雲氣白練親題寄隱淪

聞警

西賊寒盟秋犯邊黃塵漠漠暗高天一從互市通窮塞  
廿載偷安罷控弦絕域羽書飛幙府連營烽火照甘泉  
諸公早建安危策四海蒼生正倒懸

和議當年計已疎空將歲幣致穹廬總緣中夏無防禦

遂使窮邊得擣虛帷幄運籌賢相國邊陲經畧老尚書  
吾皇威福齊天地杕杜歌成樂有餘

傳聞邊郡苦天驕三輔人心忽動搖寧夏守臣紛告急  
太平天子始臨朝中原幾處憂騎虎北塞何人得射鵰  
坐看遶庭空漠北漢家新拜霍嫖姚

關山遶騎響蕭蕭司馬觀兵日度遼天上黑光久摩盪  
宮中黃屋太焚燒空揮涕淚憂時變難効涓埃答聖朝  
安得善言同宋璟冥冥氛祲一時銷

經湧泉廢寺

約客扶筇到上方，白雲空繞舊僧房。  
經臺歲久蘿陰合，香積春深草色荒。  
遺址尚傳唐甲子，殘碑猶志宋文章。  
可憐幾度滄桑變，惟有猿聲嘯夕陽。

過大笠僧太虛故居

重携竹杖訪禪栖，鐘磬無聲鳥亂啼。  
隻履乍逢歸竺國，衆香今已指曹溪。  
幻身自昔終於滅，住世虛傳得大齊。  
却笑俗情空雨淚，悟來應識世人迷。

贈趙茹霞羽士

海國真人茹碧霞廿年雲水寄生涯讀殘紫府三千錄  
看盡玄都十萬花天外瑤笙招白鶴洞中霞佩隱青蛇  
知君名姓歸仙籍為乞星壇伏火砂

吸江亭送林隱之山人還永嘉

蕭蕭匹馬萬重山遙指家林雁宕間竹葉難留孤客醉  
桃花如笑故人顏不將旅食彈長鋏已動歸心憶小蠻  
歌罷驪駒聲漸遠吸江亭外即陽關

客中憶惟起惟揚弟

誰憐歲晚滯征途無那離心滿五湖  
花外烟霞雙屐冷竹中風雨一燈孤  
斷猿叫月朝歸峽孤雁啼霜夜入蘆  
憶汝松窗讀周易莫教三逕易荒蕪

再至京師

遙控秦關百二重九天宮闕絢芙蓉  
醉中但擊荆軻筑夢裏驚聞漢闕鐘  
才子新詞皆吐鳳美人高髻盡盤龍  
玉河楊柳絲絲綠染得青袍色尚濃

中秋集周光祿花亭觀妓

何來珠履滿華堂  
絃索聲中漏未央  
狂客風流歌白纈  
妖姬雲集鬪紅妝  
月明盡撒千枝燭  
花鬱爭分百和香  
莫謂醪醑容易醉  
主人年少是周郎

送蒼峽王巡檢罷官歸鄉

越王臺上送將歸  
遠樹空林帶夕暉  
蒼峽斷猿雙淚下  
碧天寒雁一行飛  
祗愁白髮流年暮  
不問青山舊業微  
此別悠悠難再遇  
思君惟有一沾衣



寄吳叔嘉

當年歲晚過江都，聞說相如渴未蘇。  
作客生涯雲共薄，懷人愁緒月同孤。  
秋風茂苑閒清晝，春雨荒城長綠蕪。  
遙想登樓定懷土，夢魂夜夜到勾吳。

送劉宋卿還家兼訊顧長卿世卿

平蕪漠漠白雲閒，忍向尊前送客還。  
賦別此時過候館，懷人今夜閉空山。  
一年春色啼鶯裏，千里歸心去馬間。  
為問姑蘇臺上客，幾人飛夢到閩關。

送陳仲徽之齊省兄

都亭對酒起愁聲芳草萋萋感別情  
一片飛帆揚子渡五更歸夢越王城  
客途社早初逢燕官舍春深好聽鶯  
念我征鞍方暫息不堪江上送君行

堤畔流鶯不可聞此行應念鵲鴿羣  
孤舟夜渡秦淮月匹馬朝衝泰岱雲  
故國烟花隨夢斷天涯春色隔江分  
欲知別後相思意惟有登樓對夕曛

寄陳子卿

萋萋芳草滿汀洲為念王孫獨倚樓  
易水悲風孤客淚潞河寒雨一歸舟  
征途入夜勞鄉夢野店逢春憶舊遊  
獻賦不須嗟未達于今世路總悠悠

孫子長居湖上別業却寄

西湖水色碧連天湖上幽栖地自偏  
遠寺鐘聲明月夜隔林樵唱夕陽邊  
行當花徑常逢鹿坐向檀陰獨聽蟬  
聞說荒郊少人跡與誰同泛釣魚船

送玉生諸子遊方廣巖

一葉蘭舟問翠微  
滿汀楊柳正依依  
谷當絕壁僧行慣  
寺隱深溪客到稀  
半畝暮雲禪榻冷  
幾番春雨水簾飛  
花源自是堪逃世  
莫學漁郎去便歸

送田將軍武薦上司馬

侯門才子似君稀  
鵲印貂裘赴帝畿  
濟北烟花迎去馬  
潞河風柳綰征衣  
津亭春暖千鶯轉  
上苑秋高一鶚飛  
聖主臨軒應召對  
安邊何策獻彤幃

關城三月尚微寒  
一曲離歌送所驩  
客舍花飛春漠漠

長安天遠路漫漫舟移楚水晴烟斷馬過燕山夕照殘  
獨愛終軍最年少請纓還擬繫樓蘭

游宗謙山人見過

春殘花落雨濛濛十載襟期此日同一榻獨懸青嶂裏  
數杯長醉白雲中已聞嘯似蘇門遠還羨談如稷下雄  
明發河橋應折柳白頭為客任西東

清明日感懷

此心如夢復如癡荏苒春光欲暮時啼比杜鵑先有血

愁同楊柳更多絲  
林花開遍誰為主  
社燕重來亦似悲  
寒食已過非禁火  
閉門猶自絕晨炊

送妓入道

厭居綺陌慕丹丘  
斷却塵緣學道流  
夜靜有神遊紫府  
月明無夢到青樓  
六時古洞春風滿  
十二巫山暮雨休  
一曲雲璈聲縹緲  
依稀猶帶小涼州

愁把芳年老狹邪  
欲尋鉛汞洗鉛華  
西園公子求遺珮  
南嶽夫人贈紫霞  
翠袖正宜過碧海  
朱顏偏可餌丹砂

玉聲已奏僊家樂不向江心抱琵琶

題郭士龍隱居

壺公山色白雲齊一室蕭然隱者栖  
短屐每尋芳草路輕舟時泛木蘭谿  
春深綠酒聞鶯語晝靜玄經落燕泥  
欲覓武陵何處所桃花千樹使人迷

林方伯先生七十初度是日為呂純陽誕辰

共傳薇省即蓬壺白髮中朝老大夫  
申甫何年曾降嶽仙翁此日正懸弧  
一杯瓊液承金掌九轉丹砂在玉爐

莫是貞元前進士托生塵世住玄都

送人還九江

送君西去路漫漫二月東風擁去鞍  
彭蠡驚濤雲外聽匡廬飛瀑月中看  
天涯草色今猶短驛路楊花尚未殘  
不用臨歧倍惆悵一尊還共醉長安

讀禮感懷

相見黃泉未有期每思往事淚交頤  
蠹生殘篋長留粉蛛匿空房亂結絲  
花徑尚看扶杖處檉陰猶記納涼時



綿綿此恨應無盡  
忍讀風人陟岵詩

何事當年便絕裾  
誤人應是薦賢書  
九天無處闌堪叩  
三釜如今願已虛  
却恨別離同夢寐  
還驚日月易居諸  
從今不起雲霄念  
長向花間御板輿

素車白馬出燕關  
風急雲寒雪滿山  
當日已拚成死孝  
此身何敢望生還  
忍看堂上遺容在  
無復花前舞袖斑  
丹旒翩翩人不見  
撫牀空有淚潺湲

哭向靈幃喚不醒  
可憐從此隔幽冥  
雙鳬影絕人何處

五柳陰濃戶自扃  
藉草祇今稀酒伴  
種花誰復課園丁  
迴思二十年前事  
日日窻前教一經

送興公弟之吳為先人乞銘

銜哀送汝出江關  
滿路悲風損別顏  
此日素車驅白馬  
幾時黃絹勒青山  
夢迴草色離腸斷  
身著麻衣血淚斑  
憐我雙眸枯欲盡  
不堪分手更潺湲

叮嚀數語淚千行  
此去關山路渺茫  
三伏炎蒸過劍浦  
一江風雨度錢塘  
魂隨遠嶼孤鴻斷  
目極遙天匹練長

當念倚門雙白髮，莫將行色滯他鄉。

送王玉生遊吳

幾樹蟬聲亂夕暉，送君無奈淚沾衣。  
花間此日人傷別，竹裏從今客到稀。  
吳苑山川行處徧，橫塘烟雨望中微。  
登樓王粲多鄉思，目斷秋風一雁歸。

寄王百谷

三載吳門兩見君，別來相憶倍殷勤。  
夢迴半偈菴前月，望斷姑蘇臺上雲。  
赤牘此時憑雁足，黃庭何日換鵝羣。

先人墓所豐碑在應賴邯鄲絕代文

送王大遊吳兼訊舍弟

瀟瀟風雨滿征途一片輕帆過闔閭  
路指蛇門懷伍相劍藏魚腹弔專諸  
砧敲八月寒聲早葉下三江樹影疎  
若到吳閶憑問訊天涯遊子近何如

送陳子卿歸墨潭精舍

送君歸詠卜居篇精舍平臨絕澗前  
翠壁倒懸潭似墨蒼林遙望樹如烟  
月移竹色當虛牖風落松花滿釣船

聞說漢庭方羽獵未應寂寞老揚玄

雨夜登玉皇閣

鼇頂秋深起夜涼  
飄飄雲氣黯虛堂  
丹燒九轉成金母  
閣聳千尋禮玉皇  
燈影乍沉孤嶂雨  
磬聲微度半林霜  
古壇坐久天花落  
不覺餘香滿石牀

中秋同惟秦震卿集汝大草堂看月因懷惟起  
客吳

西風蕭瑟葉初黃  
入夜行歌過草堂  
金粟散時天似水

玉繩低處月如霜  
尊前竹色浮秋靄  
檻外松陰度晚涼  
遙望南飛有烏鵲  
應憐游子滯他鄉

逢慶良上人

東林結社已多年  
忽汎慈航到海邊  
自是真空能出世  
誰知綺語不妨禪  
洗瓢曲澗搖寒月  
卓錫深山破暝烟  
幾度相從談勝果  
無諸城外即諸天

送良上人還金陵靜海寺

楓葉蕭蕭露氣凝  
不堪江畔送名僧  
浮杯恐作無期別

說法誰叅最上乘  
滿路淒風聞寶磬  
一天殘月夢金陵  
懸知錫杖重來處  
傳得南宗幾佛燈

王百谷為先永寧表墓寄此答謝

西風吹雁出菰蘆  
尺素銜來字字珠  
倚馬萬言推繡虎  
臯魚雙淚感啼烏  
通家敢謂同文舉  
名筆何緣借董狐  
片石空山垂不朽  
千秋應得免樵蘇

送王生之臨邛省州守叔父獻甫

西北胡笳不斷吹  
送君南浦淚如絲  
荆門樹影雲中盡

巫峽猿聲月下悲客路裝輕懷七首驛樓燈現望峨眉  
天涯何處能相憶孤館殘更夢覺時

驅車萬里向殊方極目邛崃路渺茫官舍烟雲隣越窩  
人家風土雜夷羌綺琴曲裏挑新寡鼙鼓聲中憶故鄉  
丙穴由來魚不乏八行書札莫相忘

讀禮日謝在杭拜官湖州便道還家見訪賦贈  
當時同聽鹿鳴歌此日雲霄與薜蘿鷄骨支來天上泣  
馬蹄驚向巷中過經年聚散蹤無定一見悲歡淚更多



天上星辰催執法相思又隔五湖波

後感懷

家難相尋最可憐麻衣如雪淚如泉  
慈雛返哺嗟無日熊膽和丸憶昔年  
總為易凋萱草色却教重廢蓼莪篇  
杯棬尚在人何處不待持來已慘然

滿目悲風起白楊幽明相隔路茫茫  
總帷塵暗靈何在寶婺星沉夜不光  
忽爾無心呼阿母猶然有夢禮醫王  
板輿此日難重御一到花間一斷腸

纔入庭幃便愴情  
遺容猶在不聞聲  
蜀魂未化啼尤切  
精衛空填恨豈平  
懷似陸郎徒有橘  
孝慚考叔竟無羹  
可憐神理年來盡  
已向塵中厭久生

一夕音容背北堂  
人間那得返魂香  
百年渾似枝頭露  
雙鬢難留鏡裏霜  
爰象謾勞推季主  
刀圭空復藉韓康  
此身不但如荼苦  
血淚千行更萬行

哭李惟實孝廉

寒雲慘淡日黃昏  
壯士長銜萬古冤  
易水當年歌變徵

湘潭此日賦招魂妖狐夜半啼原野山鬼秋深哭墓門  
明歲素車過五嶺為君收淚薦芳蓀

少年俠客擅詞華埋玉空山事可嗟自是關門多虎豹  
總緣歲序在龍蛇詩餘長吉囊中草夢絕文通筆裏花  
十載交情惟一哭西風吹淚到天涯

曾同擊筑醉燕都意氣翩翩似狗屠良友忽傳成死別  
故人猶未束生芻秦廷慟哭知多少梁獄投書果有無  
我在苦中情更苦傷君那禁淚模糊

重泉冥漠隔知音從此交期夢裏尋  
颯颯悲風天外急離離芳草墓前深  
千秋獨抱亡琴痛萬里空懷許劍心  
杯酒他年澆白骨北邙松柏恐成林

寄劉季德

故人蹤跡久相違何事猶然一布衣  
九鯉烟霞歸草屨五羊山水寄金徽  
竹期王子重來看花向劉郎別後飛  
千里停雲情不淺秋風莫遣鴈鴻稀

寄許靈長

年來何處寄行蹤  
聞在吳山第一峯  
古洞烟霞生薜荔  
寒窗風雨泣芙蓉  
萬家燈影千村月  
半夜歌聲滿寺鐘  
幾度思君勞夢寐  
錢唐江上水重重

寄曠上人

瓢笠何年住化城  
閉關跏坐夢魂清  
雙雙月下浮屠影  
夜夜雲間斷磬聲  
悟徹空花諸相滅  
翻殘貝葉一燈明  
幾時結得東林社  
共證菩提了此生

鄧汝高進士轉餉遼東便道過家見訪喜贈

才華籍籍賦長楊裘馬翩翩出建章  
遼海軍儲憑轉餉漢廷郎署待含香  
笑談不帶雲霄氣名姓新依日月光  
獨有故人憔悴甚豈堪相對問行藏

送在杭司理湖州

少年擁傳暫還家捧檄新乘上漢槎  
地接洞庭多橘柚郡稱澤國半桑麻  
省刑網好開三面判事才能出五花  
手折衰楊從此別夢魂飛不到天涯

長安躍馬主恩新詞客今為執法臣  
茗水共看初帶印

滄波由此罷垂綸  
寬同漢室于廷尉  
情似樊川杜舍人  
何處公餘堪引眺  
三江烟雨五湖春

曾將才藻擅詞壇  
此日新彈貢禹冠  
早歲共稱賢宅相  
少年初拜漢郎官  
雲溪水響褰帷聽  
渚山高拄笏看  
自是法曹關象緯  
霜威先已逼人寒

爭傳詞賦是玄暉  
捧得除書畫錦歸  
屬吏共迎新綠綬  
世家猶說舊烏衣  
征亭霜冷孤鴻斷  
驛路天長駟馬飛  
君去已陪鵲鷺侶  
不才空守釣魚磯

寄答沈從先

海國秋高一鴈輕題書千里見交情  
鹿門君已逃踪跡  
鶴市誰能識姓名  
玄草謾憂詭上覆彩花長向筆中生  
淺才何敢當皇甫欲序三都愧未成

得胡御長詩却寄

蹤跡年來混酒徒獨留名姓滿江湖  
卜居已傍三天竺  
處世猶悲五石瓠刻石好辭傳幼婦  
閉門高論著潛夫  
胷中莫是波斯國寄得瑤函字字珠



哭周所諧

開緘忽報故人亡，雙淚如傾幾斷腸。  
掛劍未能同季子，知音何處覓周郎。  
到來已嘆交驩淺，死去空憐別恨長。  
多少遺編猶在篋，一回吟咏一淒涼。

當年風雨出芝山，行李蕭然夜度關。  
自謂千秋同藝苑，何期此夕謝人間。  
幾時客作鳴驢弔，何日人能化鶴還。  
一掬木蘭溪上淚，溪聲應共淚潺湲。

百年交誼隔泉扃，遙對西風淚自零。  
欲以遺文託行世，

敢將良友負幽冥，朱弦既斷誰同調。  
隣蓬重吹豈可聽，不道精靈沉已久。  
夜來猶望少微星。

生來長咏四愁詩，死後淒涼更可悲。  
二頃久無塵滿甑，一家雖在命如絲。  
人亡正及黃花節，客弔空違宿草期。  
未撫靈牀先哽咽，難將遺囑問孤兒。

戲東謝使君

綠衣紅袖兩相宜，況值還家得意時。  
夜夜琴心調鳳曲，雙雙屐齒伴蛾眉。  
月明古渡尋桃葉，露冷空江唱竹枝。

不俟五湖携粉黛今朝先已載西施

贈余宗漢明府

青鬢郎官早息機拋將墨綬變荷衣一裘已傍壺山隱  
雙鳥寧從帝里飛飲似公榮常得醉遊同禽慶久忘歸  
年來門巷清如水惟有寒鷗伴釣磯

翩翩辭賦似西京四壁蕭然類馬卿山水到時皆屐跡  
江湖何處不詩名閒來柳向門前種老去花猶筆裏生  
歲晏齋糧過九鯉與君長嘯結鷗盟

送李廷暉令東莞兼東鄧香山

初從北闕佩鳴珂  
擁傳遙從五嶺過  
官饌自今多海錯  
童謠強半是黎歌  
廣州舊甃尋陶侃  
粵國荒臺弔尉陀  
只恐簿書能俗客  
一封那肯問漁蓑

新懸墨綬赴炎方  
道過家林東別裝  
海邑三秋椰子熟  
公庭六月荔枝香  
臺中謁帝飛雙舄  
郡裏尋僊問五羊  
莫向天涯思故國  
一時冠蓋半同鄉

送丁亨文進士司理台陵

新將詞賦獻承明  
萬里分符佐楚荆  
道上竹深妃子廟  
郡中花暗白公城  
山連五嶺重重翠  
水接三湘曲曲清  
此去王程君莫緩  
幾多人吏待持平

洞庭湖上片帆輕  
萬頃微茫接太清  
楚甸峰巒天際杳  
巫山雲雨夢中生  
霜侵遠渚鰭千尺  
月照寒蘆雁一聲  
白露漸零衣漸冷  
遙知宋玉不勝情

鄧汝高雨中載酒見訪分得園字

甘將蹤跡老丘園  
忽聽軒車到薊門  
籬下一尊殘菊色

林間雙屐舊苔痕  
暝烟疎雨山山暗  
落木寒泉處處喧  
今日主人翻作客  
不須送客獨留髡

侯君右來自永嘉喜贈

西園公子舊知名  
負劍長歌海上行  
何日寢丘酬楚相  
誰人虛席重侯生  
賦成白雪驕彤管  
衣帶朱霞戀赤城  
聞說臨邛方貴客  
莫因殘歲急歸程

贈黃道晦隱君

鷄犬聲中隱者居  
桃花流水繞庭除  
芝苓服久容顏古

草莽交深世態疎，千頃滄江移艇釣。  
一犁春雨帶經鋤，有時喚渡過城市。  
不是脩琴即借書。

白首幽栖只一區，恥將名姓世人呼。  
讀書借得村中社，歲勝看將壁上圖。  
地僻絕來高士駕，家貧先辦縣官租。  
山厨不問炊烟少，猶向桑間飯餓夫。

問黃道晦病

久訝扁舟不出溪，聞君抱病意悽悽。  
空山日晚陽烏促，古砌天陰絡緯啼。  
夜冷誰人同襪被，地偏何處得刀圭。

一從消渴文園後門外蓬蒿與榻齊

方廣巖

欲覓精廬問化機蒼蒼鳥道客游稀上方雲起暮山冷  
半嶺日斜殘雪飛古樹猿驚樵子過寒林庀吠野僧歸  
路迷疊嶂不知處但聽磬聲來翠微

宿華嚴閣

萬仞巖中隱化城倚欄遙望暮雲平斷橋殘雪寒山影  
絕磴淒風晚磬聲坐對水簾塵慮遠眠當石榻夢魂清



因茲悟得西來意欲向空門了此生

巖中曉望

早起看山露氣濃玄巖古院有雲封微風入室度清梵  
斜月挂林聞曙鐘猿帶曉聲過碧嶂鶴留殘夢出青松  
倚闌但聽水簾響失却翠微千萬重

重游錦溪懷鄧汝高進士

斷橋流水自潺湲與客重來憶所驩當日共看溪上竹  
于今偏握省中蘭雲生萬壑孤筇濕雪滿千山兩屐寒

住散不須增感慨一尊林下且盤桓

壬辰除夕

人事悠悠歲月徂堂前空對一燈孤  
哀來瘦骨全如鶴聽得啼聲半是烏  
酌酒幾迴悲伏臘稱觴明日罷屠蘇  
春風不散終天恨斷盡柔腸淚欲枯

癸巳元日

嫋嫋東風處處吹蕭條門巷自堪悲  
獨斟柏葉愁如縷閒對菱花鬢有絲  
三十虛名歸馬齒半生薄命怨蛾眉

寒梅不管人無賴  
開遍南枝與北枝

迎春日

風流太守駕朱輪  
五馬驕嘶九陌塵  
椒實共拚今日醉  
梅花先報一年春  
嬌鶯乍轉聲猶澁  
綵燕初裁色更新  
市井繁華簫鼓沸  
停鞭齊看玉樓人

春日懷舊

千山萬水夢魂遙  
簫鼓聲中憶阿嬌  
半夜朱樓巫峽雨  
幾行紅淚浙江潮  
青鸞錦字終難寄  
司馬琴心不再挑

一別西湖成隔歲春風春雨長蘭若

寄陸無從

江北江南一水分尺書無計寄殷勤蕪城草色愁中遠  
揚子濤聲夢裏聞二十四橋孤嶂月五千里路萬山雲  
相思何處堪惆悵幾樹瑤花對夕曛

寄夏玄成

故人別後忽經年聞道衡門尚草玄隋苑花明高士宅  
廣陵濤滿孝廉船一雙屐齒春雲外兩地離心夕照邊

夜夜江南夢江北蕪城風雨柳塘烟

過鄭惠州墓

三尺孤墳倚翠微  
行人到此淚沾衣  
羅浮四百魂何在  
華表千年鶴未歸  
塵世功名悲薤露  
空山松柏冷斜暉  
每逢寒食倍惆悵  
風落殘花滿路飛

丘墓淒淒鎖斷烟  
墓前春草自芊芊  
空林猿鳥寒雲外  
古路牛羊夕照邊  
骨閉重泉悲永夜  
櫬歸南海自何年  
經過再拜薦蘋藻  
宰木蕭森啼杜鵑

送趙仁甫令梁山

桃花零亂柳如絲正是河橋賦別時  
夜帶江州司馬淚帆過湘水舜妃祠  
鳬飛雙鷁看應遠猿叫三聲聽漸悲  
夔府孤城縱臨眺陽臺雲雨望中疑

送人游吳楚

津亭垂柳綠烟絲萬里關山匹馬遲  
去國正當春盡後登樓多在日斜時  
楚江草長悲鸚鵡吳苑花深走麋鹿  
說別何須共惆悵秋風搖落是歸期

淘江舟中送張博士之官鎮海

淘江此夜暫同舟，千里清漳君去遊。  
春雨滿庭肥苜蓿，青山一路響鉤輈。  
雲開蜃結空中市，晝靜鱣飛海上樓。  
自是官閒堪坐嘯，刺桐花下日淹留。

過常思嶺憩福海菴次韻

白雲深處梵王家，回望千層鳥道賒。  
滿室空香薰貝葉，一聲殘磬落松花。  
聽經野鹿羣依草，出定山僧獨施茶。  
禮罷瞿曇留偈別，寒鴉影裏夕陽斜。

紫雲洞

石燈虛閣影沉沉萬壑松風起夕陰斷壁只餘蒼蘚合  
洞門長鎖紫雲深一聲鐵篴破殘夢半夜石鐘清道心  
跨鯉僊人何處去琪花瑤草不堪尋

淘江訪林德鳳茂才

一榻茅茨倚翠微暫將生計託漁磯門當瀨水潮常早  
路遠方山客到稀窗外竹聲喧午枕庭前花片點春衣  
與君相見即相別月落江頭未忍歸



宿鼓山寺方丈

維摩丈室絕塵氛坐對珠龕演梵文松際窺人孤嶂月  
山中留客半牀雲疎鐘出寺過林隱怪鳥啼春徹夜聞  
真性由來愛空寂名香親向殿前焚

孤峯天畔削芙蓉入夜遙看紫翠重一片禪心千澗水  
五更塵夢數聲鐘雲生淨土龍歸鉢露冷空壇鶴唳松  
借宿僧寮經幾載蒼苔埋却舊遊蹤

重遊喝水巖

古洞盤旋紫翠間，洞門常借白雲關。  
虛瓢掛樹老僧隱，昏磬出林飛鳥還。  
路到窮時尤巖磔，泉經渴後不潺湲。  
當年舊社成陳迹，春雨春花點地斑。

半山小憩呈惟秦

千層鳥道一筇扶，三月東風響鷓鴣。  
花發幽巖紅躑躅，雲生絕壁翠模糊。  
七閩形勝山河壯，萬頃滄溟島嶼孤。  
徐福求仙空入海，誰知此地即仙都。

落花

春光九十似飛蓬  
點徑殘英片片紅  
逐水幾看過澗壑  
因風時得入簾櫳  
杜鵑有恨啼新淚  
蛺蝶無心戀舊叢  
獨有香魂飛不散  
明年仍發故枝中

佳人無計可留春  
每見紛飛祇自顰  
總為韶華能起恨  
亦緣衰謝易傷神  
輕狂已逐泥中絮  
流落空沾馬後塵  
莫惜花前頻載酒  
浮生能得幾花辰

一番風雨一番憐  
却笑東皇浪有權  
才見芳英明苑上  
忽驚飛片落堦前  
倦遊公子辭金谷  
醉舞佳人卸翠鈿

惆悵春光容易度不堪憑檻聽啼鵲

乍見清池映曉妝驚看池面貼殘芳武陵谿上春風暗  
杜曲園中夜雨狂綠葉成陰空自媚紅英落盡尚餘香  
含情最恨東君惡不向人間理斷腸

柳

千絲萬縷鬪妖嬈和雨和烟陌上飄夜夜蘼聲關塞路  
年年杯酒灞陵橋隋堤游女輸濃黛楚國佳人鬪細腰  
只恐章臺春易老幾回攀折恨蕭條

白桃花

春風吹遍武陵源  
幻出瑤枝樹樹繁  
色似何郎初傅粉  
嬌同妃子乍承恩  
開當柳絮渾無迹  
落向苔裯覺有痕  
獨愛羽衣花下客  
玉笙聲斷月黃昏

桃花片

一夜天孫剪絳綃  
滿林紅雨亂蕭蕭  
武陵溪上香魂散  
露井風前艷質銷  
粉黛凋殘留半靨  
胭脂零落帶餘嬌  
崔郎腸斷尋春處  
人面花容兩寂寥

花影

斜陽影裏月明中一種葳蕤幻兩叢  
零露滴時還蕩漾輕雲遮處更朦朧  
風吹頻覺嬌無力天暝方知色是空  
忽訝落英飛滿徑幾迴持帚誤呼童

芳英灼灼葉蓁蓁倒影雕欄態更新  
忽遇燈光成幻境倩將月色為傳神  
分明鏡裏看珠翠彷彿帷中見玉人  
世界陰晴元不定可憐生滅總非真

水中花影

一枝濃艷俯滄浪彷彿還疑鏡裏妝波面波心飛蛺蝶  
樹頭樹尾宿鴛鴦浮萍點綴偏生色流沫潺湲豈有香  
借問嬌姿誰得似洛神方在水中央

夕陽

義馭難留忽已西東山猶帶一痕低能催古寺疎鐘起  
漸聽孤城畫角齊影入蘆汀羣鴈落光銜茅屋亂雞栖  
此時誰是銷魂者成婦閨中最慘悽

白鴈

踰躑刷羽度衡陽遙望還疑縞素妝起處蘆花飄岸渚  
低時殘雪點瀟湘帶來遠塞千山月叫落深林半夜霜  
影入薄雲看不見湖光漠漠楚天長

白燕

呢喃長日畫梁中素質冰肌迥不同玉剪飛時遙可辨  
寶釵化去竟成空梁園夢遠梨花月隋苑聲殘柳絮風  
莫戀烏衣歸舊國藏身合在水晶宮

弓



誰挽烏號五石強由來猿臂可穿楊蛇疑杯裏終難釋  
鳥盡林中便已藏開處流星過絕塞掛時殘月在扶桑  
世間得失原無定尼父當年笑楚王

萍

有葉無根不用栽還疑水面長蒼苔遊魚吹浪重重亂  
彩鷁衝波兩兩開却得微風依岸泊不容明月入池來  
忽然一夜添新雨蹤跡飄零信可哀

蝶

傅粉嬌姿五色衣由來生性愛芳菲夜深栩栩夢中化  
日午雙雙花底飛偷得餘香過別院帶將春色入簾幃  
只愁荏苒韶光暮飄泊知從何處歸

元夕冰燈

燈燭熒熒照夜闌分明影裏見琅玕雙雙羅襪凌波濕  
朶朶金蓮出水寒新製恍疑來貝闕高懸只合在瑤壇  
為言火樹休相逼只恐清輝一夕殘

虞美人草

青草香魂是翠蛾，托根元屬楚山河。年年野燒咸陽火，  
夜夜啼蜚玉帳歌。恨血清霜凝處滿，淚痕殘雨滴時多。  
漢宮亦有如花貌，誰向春風化碧莎。

病美人

長伴流蘇與合歡，腰肢瘦盡黛眉殘。漸看衣帶愁中緩，  
却恨春光枕上闌。夢去何心遊楚峽，起來無力步邯鄲。  
一從玉指纖纖困，挂壁秦箏久不彈。

老農

容貌衰癯兩鬢華難將生計事污邪手栽禾黍知多少  
眼見田園屬幾家時課兒孫勤耨獲閒從隣叟話桑麻  
昨朝扶杖過春社還祝甌窰欲滿車

老醫

曾將奇術冠青囊八十年前遇長桑臂在不知經幾折  
眼花何用檢諸方有劑可令千人活無藥能銷兩鬢霜  
橘老杏殘筋力盡定應死去作醫王

題王太史家藏孫都護墨菊

西園公子費隄廩貌得寒花色更奇玄品合栽陶令宅  
幽姿宜傍右軍池青烟落處渾無辨白露凝時却易知  
籬下幾人能識取祇疑佳種出松滋


水簾

潺潺千點響淙淙一片冰綃掛碧空日射恍疑金絡索  
月明如坐水晶宮神龍噴處珠盈貫玉女來時佩馭風  
十二闌干遙騁望萬重山色總朦朧

壽林天懋母黃太夫人

百斛瑤漿滿玉壺壽筵猶進大官厨  
堂前賓客皆鵷侶膝下郎君是鳳雛  
重見封章傳內使又看書信寄麻姑  
傍人莫問千秋筭五嶽長存海不枯

仙衣初剪紫霞綃鏡裏霜鬟尚未凋  
賢媛正宜參八座殊恩今已錫三朝  
吹從玄鶴空中度書寄青鸞海上遙  
多少翟公門下客紛紛猶進白雲謠



幔亭集卷七